

攻媿先生文集

十三





攻媿先生文集卷第二十五

四明樓

鑰大防

奏議 別藁

論聽納

臣竊惟人主求言非是止循故事人臣進說必欲有益國家君臣之間各思致治上下相應本同一體而上之求於下下之進於上齟齬不一今古患之前賢之論可謂詳備更有二事臣敢詳陳一是忌諱拘牽二則指摘效驗為害實廣人或未思何謂忌諱拘牽蓋人主崇高獻諛者衆以年則稱億萬以祚則謂無疆頌德則必擬堯舜論治則不數漢唐習聞順指之辭罕陳兢業之戒天文示異則移占於殊域水旱為災則委罪於州縣姑務一時之美聽本非平日之後言一有立論稍高出言据正則或相夸以為過豈知言不激烈不可以動人言無顧忌乃足以達意故禹以丹朱而戒舜周公以商受而戒成王君臣一心不以為異秦漢而下忌諱實多京房之說王章之言既大寤於君心又深中於時事可謂一時之至論羣臣之未發止緣權倖側





目姦諛蔽欺弃其大端摘其小過因緣人主之  
諱惡顯坐臣子之非宜致之死地以鈴衆口由  
今觀之驗以漢事使房之說獲用則石顯之徒  
可誅而孝元之政不壞矣使章之言卒行則王  
鳳之黨盡去而西京之祚不墜矣拘牽忌諱以  
至於此此臣之所謂害之一也何謂指摘效驗  
蓋人臣進言求益於國前有據依後有證驗庶  
幾得事理之實可以回君上之聽傳之簡冊以  
爲格言如賈誼之論侯國江統之論徙戎言雖  
不用事則果然證驗之明如合符契可謂善於  
立說者矣然而進言之士指陳事實必曰如是  
則治安如是則危亂或引商而爲鑒或借秦而  
爲喻自是進言之體無非愛君之言正欲人主  
垂聽可以制治於未亂豈願他日有悔徒取知  
言之虛名然而未形而言多謂其已甚既言之  
後或未必盡然便謂好爲過言不見其效成讒  
夫浸潤之間啓人主厭言之心人臣既爲君上  
而言固當不苟人主但求有益於我何問其他  
且如水旱之始皆謂盜賊可憂賴 陛下圖之  
於初救之備至饑饉者既得所養姦傑者無所



發端至于今日卒以無事此非天幸實出人謀  
在今日事雖不然而其初真有可慮若謂太過  
則誠不可以此知但當視其鑒戒之言益增警  
懼之意若始疑其過末指其妄則言者憚矣  
陛下愛養敢言之氣深察羣下之心如臣所陳  
又何足進竊惟古人之論猶未及此敢因奏對  
輒罄愚衷儻聖明少賜採擇不爲小補

論帥臣不可輕出

臣竊惟諸道置帥官稱安撫兼兵民之權有分  
閫之制朝廷選擇甚重不輕比年以來遇有盜  
賊竊發州縣所不能制者必使帥臣親行雖多  
成功臣竊慮此水旱饑饉旣不能免潢池弄兵  
安保其無若自此以爲故事帥臣動輒臨戎恐  
非國家之長策也仰惟 神宗皇帝垂意邊事  
廟謨深遠廼熙寧九年知成都府蔡延慶言乞  
發陝西兵援茂州俟兵集自將以往令轉運司  
攝府事詔朝廷已遣將部兵延慶務在持重毋  
得輕去成都元豐六年河東經略司言西賊入  
麟州神堂寨知州訾虎等領兵出戰有功詔虎  
自今毋得輕易出入遇有寇邊止令裨將出兵



拚逐 神宗之慮深矣蓋帥守之臣民之司命一有失宜衆心易動當令指授方略調度軍食持重鎮撫以靖一方雖有挫衄根本不搖若使輕出利害實大蓋帥臣之行建牙郊野堪戰之士咸在行陣從行兵卒必是單弱而又隨宜遷次登陟險隘脫有黠桀之盜伏隱篁竹乘間捷出以犯大帥之顏行則賊勢易張國威難振倉猝之頃可勝言哉故延慶有請既拒而不從訾虎成功亦因以切戒此臣平日之所慮適合信史之所傳無事而言似非時務愚者一得願效君前伏惟俯矜微悃曲留宸念臣幸甚

### 論役法

臣竊惟州縣之事其切於民者莫大於役法而害於民者亦莫大於役法役法不明民受其害仰惟 陛下愛民如子罷行利害惟恐不及而民猶未安田里者蓋役法有以害之也夫民之畏役如避仇讎苟可以幸免則無所不至甲當爲之必曰乙富於我乙當爲之必曰丙之增產倍我民之姦僞百出吏之上下百端州以爲甲可甲不已而訴之運司則以乙爲之乙又訴於



常平司則復及於丙矣取其案而觀之則據法援例皆不可破三者交訐不勝不已卒之豪強得志而害及下戶小人以氣相高往往未被供役之害而生涯蕩於吏手矣臣在州縣見斯弊詳求其故蓋前後臣僚論列有爲朱脚白脚之法者有爲鼠尾輪差之法者朝廷行之正求以便民然而申明愈多法令愈繁有司不知所守而舞文之吏因得竝緣爲姦而民益病矣臣嘗求之一鄉而得之其法明而易行簡而易守凡物力及百緡者役一月及千緡者役十月其間多寡有差大率皆以月計行之既久上下相安甲滿而乙代之乙去而丙爲之不容吏與其間而民亦樂其力役之均無復訟訐爲令者謂使它鄉皆然則邑事去強半矣惟其官司素無定法故難以推而行之臣以爲苟以此施於天下何爲而不可如曰風土有異同版籍有多寡不可一律則使凡鄉之富者或數倍於此則以此法等而上之以三百緡五百緡供一月之役鄉之貧者或不及於此則以此法等而下之以三十緡五十緡供一月之役以天下視之疑若輕







全指揮及東西作坊見役三千七百餘人歲支錢二十九萬緡約米四萬餘斛用人不爲不多廩之不爲不厚而猶以爲未足更於諸州作院差撥兵士入所又一千餘人歲支錢八萬餘緡米九千餘斛而諸州又厚有衣糧以贍給之此所謂蠹國者也 陛下睿明洞照灼知擾民之弊近已將諸路日前歲額泛拋軍器物料並皆除放民頗息肩矣惟蠹國之弊未有以上聞者夫以本所日役三千七百餘人苟能汰去老弱嚴禁冗占專擇可用之卒日督其程則軍器不患於不辦今旣以無用之人雜處其中而徒取外郡之卒更直於此重耗廩給將焉用之臣愚欲望聖慈特賜詳酌攷軍器之程計工徒之費如臣言或有可採即乞睿旨將本所三千餘人專責其工役所有諸州兵匠遣還元來去處歲省公家之錢幾萬緡米幾萬斛蠹國之害旣衰而小人亦免旅居之歎有利而無害惟 陛下圖之

論福建鹽法

臣仰惟 陛下勤卹民隱宵旰求治民生利害



無小不聞或罷或行曾不淹日茲非勵精之明  
驗歟竊惟推鹽之法天下通行七閩之法公私  
尤便上州得鹽下州得米民不淡食官收其贏  
漕司平其多寡州縣賴以充用田里之民尤爲  
樂業而行之既久不能無弊官無本錢而豪民  
出其資故大半之利歸於私家縣有積逋而漕  
司取其數故般運之贏廢於中道支發紊先後  
之次綱船有滯留之費浸失古人立法之旨議  
者不知講求弊源去其太甚者而圖其餘使害  
去而人不知利興而民有賴乃一切欲以推筦  
之法齊之行之未幾公私俱病賴聖明盡復其  
舊吏民無不鼓舞然新法之害既去而舊法之  
弊則未之講亦未爲盡善也臣愚欲望聖慈行  
下監司諸州講求見行鹽法有未盡者纖悉必  
聞舉其偏而補其弊立爲成法俾之遵行以惠  
閩粵於無窮不勝幸甚臣恭聞 仁宗皇帝有  
欲增河北鹽價者 仁宗御批所奏有曰朕終  
不忍使河北人食貴鹽父老聞之掬香於手望  
闕焚之以謝聖恩 祖宗德澤之在人如此蓋  
鹽者人之所共利立法苟善所被實廣惟 陛



下財幸

論主簿差出之弊

臣竊惟縣置主簿專以勾簿書之稽爲職凡一縣稅賦之輸納實總之銷簿對鈔尤爲緊切而監司郡守循習故常以主簿在縣官中最爲事簡差出不時甚者至泐檄無虛月朝歸而暮出雖有勤幹之吏困於往來欲竭力效職而不可得簿書期會比之教化則爲細事在州縣之間則急務也小民輸官租得鈔而歸官司勾銷名簿則可以優游卒歲豪強頑猾據簿之未銷者

五城之集卷第二十一

卷一

九

督之則無所逃罪其間利害皆係於簿書簿書不明則吏得以肆意爲姦貧民下戶至有已納而更輸豪猾之家苞苴把持或至於幸免然則主簿之職若閑而實要如此任職而不勤責固有所歸矣奔走道塗而一旦以不職被譴彼有辭焉臣愚欲望 睿旨諸路監司守臣遇有差出輪點諸縣主簿量立定制每歲不得過兩次又計日月之多寡較道里之遠近而比折之當差出者不得以請求而免已滿兩次者不得復差庶使小官得少安職守簿書不至猥弊而民



被實惠矣

乞 東宮官進嘉言善行

臣仰惟 陛下深惟天下之大本立儲宮以安社稷置僚佐以任輔導之職真一代之盛典也臣猥以庸陋備貢其間且得執經從容以待承華千載榮遇非所宜得思欲殫智竭慮以稱陛下任使之意補 太子聰明之餘雖 太子天資敏明謙勤好學而臣不過於誦說之間可以少效其愚 誦罷而退雖欲陳述古今以資盛德無由以進返而思之實不遑處臣竊聞 祖

攻媿文集卷第二十五

三十一

宗時應東宮 三府官屬每五日必使各進嘉

善行一條臣 欲望睿旨申行故事使臣等每

五日必以一 進如有已見因而詳論其是非

當否不問曲 治亂帝王臣子凡人言行可

以勸可以戒 於百家擇其機要以奉 太

子則上性愈明輔成儲德區區之心得逃尸素

之責矣王府僚屬亦倣此而行之必有日新之

益此故事也

攻媿先生文集卷第二十五



攻媿先生文集卷第三十

四明樓

鑰大防

外制

吏部尚書趙汝愚兼侍讀

勅朕退朝之餘務學爲急開邇英之閣肆求經史之遺言對無逸之圖慨念祖宗之美意正有資於勸誦顧何憚於增員具官某秀出天支蚤收儒效擅間平之譽久宣出藩入從之勞條晁董之言尤見憂國愛君之意謹銓衡於選部實領袖於禁途朕惟歷代編年之詳萃於通鑑之紀三朝致治之要列于寶訓之書爾其因事進規盡忠無隱矧是宗盟之彥首陪經幄之游尚服異恩以稱公選可

寄資武功大夫幹辦御藥院陸彥端  
轉歸吏部除帶御器械依舊幹辦

太一宮

勅具官某爾給使宮省謹而寡過肆還寓秩列之銓選屬鞬九陛仍護竹宮往哉惟欽毋替于舊可

武經郎趙不淹換太子右監門率府



率

勅具官某國家宗支視古爲盛然以屬近行尊  
得奉朝請者亦鮮矣爾修飭有素宗老薦其詳  
雅授以正率日陪近班尚勉之哉以永終譽可  
許從善循修職郎

勅具官某爾以假吏往從使節茲登仕籍始得  
論賞雖曰踰時亦不失勞矣可

從政郎邵武軍司理張令照降兩資  
放罷

勅具官某治獄之職惟公則平爾曲奉上官縱  
吏爲僞以陷人於深文臺評來上罰其可追再  
鑄厥階歸務循省可

修武郎前監紹興府東城酒庫馬鎰  
降兩官

勅具官某爾職權酷驚擾田里憲臺按治囂訟  
自解削秩免官以正名分可

朝散大夫知邵武軍趙師造降兩官  
勅具官某政平訟理郡太守之先務也爾按吏  
不審乃諷脅理官僞爲文記以傳致其罪彼罪  
雖得爾其可供罰乎褫秩二等以戒鍛鍊之吏



可

從政郎賀正使書狀官俞南仲循兩資

勅具官某朝廷選修聘之使而使之自選其屬爾以庠校之彥為之少從禮成而歸賞可後乎可

何謙韋益並循修職郎

勅具官某集故事以成書儒館之職也爾隸西省亦與有勞既登仕版仍進一階可

韋益改東省

朝散郎温州通判傅頤降一官放罷

勅具官某權貨之禁至為嚴密治中別駕實專掌之爾職在是而不能戢吏卒之冒法豈惟關防之弗嚴抑見威令之無素削秩免官以懲不恪可

福州觀察使王抃父康贈武功大夫

成州團練使

勅朕肇裡南郊祇見上帝爰推霈澤以及萬方仕登朝列皆得以及其親具官某故父具官某有子以廉車告歸爾亦與此卹典尚其有知欽承休命可



寄資右武大夫遙郡防禦使 皇子

嘉王府都監韓世榮轉歸吏部在

京宮觀

勅官躋橫列使領遙防是爲右選之華用示內  
班之寵具官某進謹赤墀之奉退祇朱邸之勞  
歷年寢多以疾來諗俾隸名於銓部仍賙祿於  
真祠尚服渙恩以保終吉可

承節郎潘時美嫡母孔氏年九十一

歲封孺人

勅具官某嫡母孔氏比肆郊霈推老老之恩爾

文獻通考卷第三十

外一

四

晉書

年登九齡子爲命士予之湯沐以爲晚歲之華  
可

通奉大夫顯謨閣待制陳峴係韋潛

心舉主降一官

勅賢引其類固難保於終身稱匪其人亦何逃  
於定制具官某蚤登膺仕屢薦小官逮歷歲之  
既深有字民之無狀按章不審雖多刻吏之文  
具獄既成莫揜貪夫之跡考尋舉將乃屬從臣  
以嘗遇於霈恩姑稍鑄於命秩尚爲寬典毋有  
遐心可



嘉王府講尚書徹章官屬各轉一官

承議郎中書舍人兼翊善黃裳

勅朕有元子教之以義方爾以名儒導之以經術既闡百篇之奧可稽一秩之褒具官某造理精深處心夷曠出廷臣之右能介而通從吾兒之游最專且久博文約禮欲著乎心考古驗今如指諸掌因乃天資之美加之學力之優茲焉進官姑以示寵惟帝王之胄非務爲章句之徒發經史之微尚益明事物之要既上紫垣之直仍先朱邱之僚進有賴於論思退尤資於講習其祇朕命式究爾心可

五朝文集卷第二十一

十一

十一

承議郎著作郎兼贊讀黃艾朝奉

郎軍器少監兼直講陳士楚

勅具官某朕以元子天資之良遴選賓友以輔導之惟爾艾爾士楚俱以儒英從吾兒游典謨訓誥誓命之文講貫既久以至終篇旌爾賢勞何愛一秩其益暨乃僚秉乃心相與發明經史之要日計不足而歲有餘厥惟休哉可

知揚州錢之望復直寶文閣

勅具官某朕肇禋南郊爰肆霈澤士有一肯感



復厥初矧吾帥臣起臨邊閫日著聲績如爾之  
望者顧可後乎爾守襄陽煩言荐至稍鐫寓職  
于今三年因子泰時之恩歸汝寶奎之直其祇  
寵渥益懋爾功可

成都府路第二將高師顏制置使司

奏舉知黔州

勅具官某蜀道萬里士有負文武之才者朕何  
自而知之爾起將家歷戎職制使謂爾通練老  
成連帥又稱其沉毅通敏朕以二臣之言試爾  
以黔中之守爾能不負所舉則知所以報國矣  
可

泉州同安縣靈護廟神封威惠侯

勅具某神朕之愛民至矣吏治于明神職于幽  
苟利吾民雖遠必錄以爾神廟食海嶠久著靈  
跡却蠻蜚而張官軍招海賈而銷癘疫有司覈  
實具以上聞錫爾嘉名歆予茂渥可

承直郎坑冶司檢踏官蔣益降一資

放罷

勅具官某國家置使江左以總諸道之貨泉設  
屬支郡以究山澤之遺利爾其屬也冶工爭攘



至相戕殺爾實啓之劾章既聞其上一秩免所  
居官吏之不虔庶乎知警可

修職郎臨安府昌化縣主簿趙善視  
降一資放罷

勅具官某爾筮仕之初密在畿邑是何么膺敢  
爾披猖鐫秩免歸尚爲輕典爾則自取將誰咎  
哉可

入內內侍省都知鄧從訓該奉上

高宗皇帝徽號冊寶轉協忠大夫  
依前奉國軍承宣使

勅朕推尊

烈祖務極隆名寶冊之嚴式資辦

護均行賞典爾則先之具官某服在禁庭恪共  
衆職橫班秩峻旣兼留務之華 高廟禮成實  
在賢勞之首爰加命秩用荅爾勤可

倪思等爲係常良孫舉主各降一官  
禮部侍郎倪思

勅人未易知其來已久士不自愛乃至於斯旣  
駭予聞致貽伊感具官某夙推清望遍歷華途  
比因繕監之遷爰謹屬察之薦家旣傳於清裁  
人亦謂其端良俄隱慝之遽彰何貪心之已甚



考尋舉將乃屬從臣以其未脫於七階俾爾姑鑄於一秩勿以懲羹之故而忘推轂之公可

中散大夫知通州章沖

勅具官某人之難知舊矣爾爲南蘭陵以戶曹爲賢而舉之閱歲旣久乃以賄聞申舉將之罰不可廢也其上一秩毋忘省循可

隆興府佳山孚應廟神封惠濟侯

勅具某神國家愛重爵賞非有功不俟人神一也以爾神生而不求聞達以忠孝而化人沒而能著靈響有功利以及物手植之槐猶在舟行之禱必答予之好爵其尚歆承可

朝請郎致仕劉礎降一官

勅具官某朕視嶺海猶畿甸也爾守蒼梧而部使者謂爾加賦於民且曰遂祠請而未拜聞劾章而徑行雖已掛冠豈容幸免姑鑄一秩以示薄懲可

從政郎錢逖降兩資候服闋日與遠

小監當

勅具官某細民以煮海爲業私販冒禁或未能免爾仕至邑令又方執喪使者廉按謂爾爲逋



逃之淵藪何耶削去二階姑令終制朝祥暮貶其尚何辭可

寄資訓武郎 嘉王府都監朱思正

轉歸吏部在京宮觀

勅具官某服役內廷兼官王邸克勤所職以疾丐閑祿以內祠秩之吏選尚欽朕命以善爾躬可

成鏞知黔州

勅具官某爾奮由武科屢更事任黔中雖遠委寄不輕外控夷蠻地當一面命爾作守凡牧民固圉之事尚勉之哉可

寄資武義大夫果州團練使 重華

宮祗候董友聞轉歸吏部

勅具官某爾職聯中禁使領遙團共事累年以疾求退俾仍舊列往赴右銓益務檢身以俟收用可

秉義郎閤門看班祗候韋琳報班差

錯降一官

勅具官某朝儀尚肅賓贊尤嚴進退降登視以爲節抗聲失度時汝之辜爰削一階以懲不恪



可

郭棣知瀘州

勅掌殿嚴之武衛夙著勤勞分邊閩之顧憂茲  
煩填撫睠予世將聽我訓詞具官某稟資沉雄  
馭下嚴整出臨淮海嘗當一面之權入總貔貅  
久護千廬之密比歸故里既歷累年惟時瀘川  
控彼蜀道靡有蠻夷之外侮何期蝨賊之內訌  
狂卒稱兵衆無與者仇人假手天實誅之顧平  
時謀帥之甚艱豈今日擇才之可後疇堪予選  
僉曰汝諧爾其設方畧以靖驚疑示寬大以安  
反側凶徒既殄無問脅從義士寔多當行第賞  
綏爰有衆遂令境內之清坐折遐衝益致王靈  
之暢佇聞嘉績別議優恩可

文州靈惠豐安侯加封嘉應

勅具其神朕成民而致力于神陰平去都城萬  
里苟有利於民亦不汝遺也增以嘉名用答靈  
貺尚其歆奉以惠遠氓可

文林郎保寧軍節度推官趙善謙降

一資放罷

勅具官某爾以宗子居大郡莫府不能自繫其



身乃與胥徒共爲姦利償券焚曆欲蓋而彰鐫黜示懲尚服寬典可

文林郎寧國府司理盛將之降一資勅具官某獄事至重豈容小差爾職其閒乃爾失當諒其非故姑示薄懲可

承信郎石璿父榮年九十五保義郎致仕

勅具官某父某比肆郊霈推老老之恩爾年登九齡子爲命士授之武爵以爲晚歲之華可

興化軍莆田縣順濟廟靈惠昭應崇福善利夫人封靈惠妃

勅明神之祠率加以爵婦人之爵莫及於妃儻非靈響之著聞安得恩榮之特異具某神壺彝素飭廟食愈彰居白湖而鎮鯨海之濱服朱衣而護雞林之使舟車所至香火日嚴告賜便蕃既極小君之寵禱祈昭荅遂超侯國之封仍靈惠之舊稱示褒崇之新渥其祗朕命益利吾民可

朝請郎張抑爲係舒光舉主降兩官勅具官某人之難知舊矣爾持江東使者節以



池陽郡博士爲賢而舉之閱歲已久乃以賄聞  
比申舉將之罰惟爾在哀疚而未及旣除喪矣  
其上二秩毋忘省循可

遷郡刺史知和州某依舊武功大夫

祁州團練使

勅具官某將門出將其說古矣紹興以來名將  
之後人才不乏鮮有以將略世其家者爾起自  
西陲屬韃九陞頃由選擇出守山陽雖邊塵不  
驚智勇無以自見而首尾五載固圉有勞徙之  
大邦陞以遙圍之秩朕之知汝深矣勉趨功名  
毋忝爾祖可

文苑一集卷第三十一

外一

三

丁卯年

寄資訓武郎韓果轉歸吏部在京宮

觀

勅具官某服役禁庭屢更歲籥恪勤所職式閔  
其勞祿以內祠秩之吏選尚欽朕命以善爾躬  
可

文林郎監泰州鹽倉周大老降兩資

放罷

勅具官某鹽筴之盛莫如海陵積弊之深亦非  
一日今帑中之藏至失十萬白發吏茲汝之職



也詳究始末失職已多而又不能自別於真貨之嫌再鑄厥官歸務循省可

朝奉郎知湖州烏程縣趙彥衛爲鄉民訴水傷擁併死損八人降一官勅具官某爾試邑輔郡能聲徹聞秋潦爲災訴者輻湊老羸蹂躪至有死傷雖非關防所及各將誰歸其上一階服我寬典可

嘉王府講尚書徹章官屬諸色祇應人各轉一官資

內知客修武郎譙令雍秉義郎戴勲

勅具官某賢王務學講席徹章惟此百篇之書坐閱八年之久凡與職守咸進官聯爾起于諸生班在上閤祇事朱邸見謂恪恭渙恩所加勿謂故事尚勉思所以稱此者哉可

使臣忠訓郎姜文用孫昌祖忠翊郎姚思正保義郎董致中徐松成允顯高珂指使從義郎馮涇王良講堂使臣秉義郎蔣巨卿張克家講堂書寫文字進武校



尉張桔承受所手分承信郎野  
良嗣承受下主管文字忠翊郎  
適興祖客司成忠郎傅昌世前  
都監訓武郎朱思正醫官成全  
大夫陳世安翰林醫候李之美  
成全郎陳翊

勅具官某等王邸談經閱歲滋久凡日執事咸  
進厥官徃其欽承益務恭恪可

秉義郎楊忠輔換太史局丞權同知  
筭造

勅具官某周之馮相氏保章氏皆以中士爲之  
星曆之學爲士者可不務乎爾遽於曆徹于朕  
聽因其所長俾貳局事推步日月星辰之行以  
稱朕欽天授時之意爾尚勉哉可

殿前指揮使行門長行左班楊坦劉  
選李端邢敞沈明黃毅杜椿吳珪  
蔡顯右班王佐邊寧李鈞孫彬陳  
琚曹換王浹黃義陳圭換武翼郎  
添差諸州駐泊兵馬都監

勅具官某等行在所猛士如林又擇其雄毅之



尤者列在人門爲予爪牙歷歲旣久親閱挽強之技超授武爵護戎方州錫之袍帶以寵爾行毋忘衛上之忠益習近民之事尚勉之哉可

殿前指揮使守闕行門長行左班許

坦聶榮明澤孫伸右班盛俊吳倫  
郭錫換從義郎

勅具官某爾等以拳勇選密侍宸居有年于茲矣親閱其藝視高下而賦之爵尚勉之哉毋怠於事可

神騎嵌補副指揮使姜勝換秉義郎

十二

正地八十一卷第二十一

久一

一三

介三

宣武嵌補指揮使徐成換從義郎

天武下名副指揮使呂俊換修武

郎

勅具官某爾等蚤以武勇備予羽衛閱歲旣久而挽強之力不衰授爵有差徃親民事益務忠恪以稱所蒙可

趙介循從事郎

勅具官某爾以刀筆爲冊府之吏周旋四庫其職清矣又以奏篇之賞疊進資級其思所以稱此者哉可



入內內侍省都知鄧從訓轉履正大  
夫依前奉國軍承宣使餘如故

勅總禁廷之務久矣宣勞居橫列之班茲焉進  
秩具官某持身克謹遇事惟勤出入宮闈習見  
累朝之故實侵尋歲月兼提衆職之綱條爰因  
酒正之修更陟武階之峻勿云近比思稱優恩

蕭鷓巴奏孫秉義郎存德乞將磨勘  
轉官回授母淑人耶律氏封郡夫

人

勅命婦之封率從於夫爵小君之號茲越於邦  
彛某人蚤嬪名將之家同慕中華之義兩朝示  
寵名已著於鳩桑一子馳恩榮特頒於鸞誥往  
服朕命益宜爾家可

朝奉大夫錢之望奉使回程轉一官  
勅具官某比遣使華往修鄰好聞其扶疾慮有  
闕事見大夫非無可使恐不及期以爾志存許  
國才足應變輟自邊閫俾將予指闡命引道禮  
成來歸進之一秩姑以勞還俟訖外庸嗣有褒  
擢可

武翼大夫楊大節奉使回程轉官



初具官某朕歲遣使華往修鄰好必選上介以輔其行爾以扈衛之臣爲行人之副中途易節調護無虧惟爾之能應予之賞俾增命秩其尚欽承可

奉使官屬文林郎陳元震從事郎譙令憲迪功郎錢廷玉忠訓郎郤師孟忠翊郎黃允迪訓武郎李邦安忠翊郎楊祖烈吳良弼趙進承節郎張達符溥從義郎何洵保義郎金彥達進武副尉王冲各轉一官

勅具官某歲遣信使修好鄰邦凡爲假吏之行舉有優恩之及用酬勞勩毋替忠勤可

武功大夫和州防禦使殿前副都指揮使郭杲落階官

勅總千廬之衛久護戎昭放一札之恩用申褒律具官某器資沉鷲謀略雄深飭邊備於上游坐銷外侮肅軍容於中壘允藉壯猶朕慨宿將之無多眷故家之可用繫爾昆弟爲予爪牙茲徹武階俾專使領庸示等威之峻式昭名器之公其服恩榮尚圖忠報可



閣門祇候訓武郎李彥機從義郎李  
刪秉義郎楊應龍應奉人使到闕  
一十番各轉一官

勅具官某等信使來庭掌在上閣賓贊之職不  
容毫釐之差祇事累年積勞可賞進之一秩益  
務恪恭可

從事郎成州天水縣令韓廷圭降兩  
資

勅具官某邊臣無小大皆以忠實為先爾以逸  
囚受罰矣而又為欺荐削一階用戒來者可

皇叔祖士峴男太子右監門率府率  
不怵轉一官

勅具官某國家以十階待近屬必十載而後一  
進其選嚴矣惟我宗老行尊年高爰寵其子躡  
等而授雖曰近比實惟異恩可

忠翊郎李孝純落階官閣門宣贊舍  
人

勅具官某爾以名將諸孫中宮兄子不患不致  
富貴顧所以將之者如何耳頃聖吏議亦既累  
年察之蓋詳克自循省賓贊之職用以命汝念



之哉知復玷缺之難難則知所以保其身矣可  
故責授安遠軍節度行軍司馬詹儀  
之追復中大夫  
勅具官某朝廷念廣西鹽筴之弊因爾建議使  
行其言非徒無益而又害之爾既知其不可而  
不能自己何耶解絃更張事始少定褫官置散  
以謝遠民而爾亦亡矣爾豈欲害民者徒以昧  
於不遠復之義而致此亮其本心追復舊秩能  
體此意尚為有知可

太中大夫參知政事胡晉臣提舉修  
壽皇會要并禮儀使轉一官

勅朕寅紹丕圖推尊慈極纂修帝制尤嚴於五  
載之餘登奉寶儲遂全此一王之法惟時近弼  
兼總宏摹矧相禮以備成豈疇庸之可後具官  
某該通而知務端靜而善謀頃上禁途居然有  
公輔之望迨升宥府足以致朝廷之尊俾參豫  
於政機益茂明於國體緝成大典允藉宗工誕  
舉縟儀更資使範以侈重華之盛以彰疊矩  
之傳爰序進於崇階尚勉從於遜牘增陪采食  
仍衍真畬噫鋪張闋休實贊我顯親之志奉行



故事尚堅而致主之心往服訓辭以綏寵渥可  
從事郎趙彥适收使射中減磨勘循  
一資  
勅具官某國家選士於廷又命以射爾以宗支  
之秀既擢儒科能游於藝且應賞格何愛一階  
以示勸獎可

從事郎王堯佐前任復州司理載鐵  
錢入銅錢界筭請鹽鈔降一資

勅具官某冒利犯禁齊民則有之爾為獄掾乃  
敢以身而試法稍鑄命秩猶為寬恩可

朝請郎尉聞詩前知永康軍拖欠綱  
運降兩官

勅具官某朕崇儉示朴未嘗加賦於郡邑然軍  
餉則不容闕也永康雖小賦入有度及爾為之  
闕供甚矣鑄去二秩以勵其餘而猶不奪爾合  
江之符以不得罪於民也其務足用勿以懲羹  
而取盈焉可

朝散大夫知明州高夔為提刑陳倚  
申厲雄公事不自陳避嫌降一官  
與邊郡



勅具官某爾以選擇屢典大藩四明富民之訟使能俟屬邑之公行聽憲臺之移獄則晏然無事矣部使者謂爾不能引嫌疑有未盡鑄官一等易地邊方汝往哉其思有以靜鎮之可

朝散郎國子博士徐堯上殿墜笏降  
一官

勅具官某爾以老書生獻箴于朝此意勤矣朝儀貴肅乃爾失度雖欲宥過不應但已稍鑄命秩以儆廷紳可

寄資右武大夫遙郡團練使符滌降  
兩官放罷

勅灑掃是職專務盡恭過愆有聞豈應從恕具官某久以勤敏祇事禁嚴當克謹於官箴乃自貽於罪罟命鑄橫列尚畀遙團罷歸銓部之班顯示貂璫之戒可

內侍高品李元美降忠翊郎放罷  
勅具官某禁廷貴肅三尺尤嚴爾職其閒而越法度削官二等尚爲寬恩可

閤門祇候潘瓚落看班

勅具官某爾祇事昕朝再更歲籥稽之故實盍



正官稱益務恪恭母怠於久可

皇后親嫂碩人許氏特封郡夫人

勅命婦之封盍從於夫爵小君之號茲出於上  
恩故某官妻許氏蚤嬪將家今爲后族廉車旣  
往莫諧借老之宜戚閑方興實號懿親之長屬  
禕衣之歸謁分石窀以䟽封尚惟法度之循以  
對寵光之渥可

直敷文閣史彌正爲高夔奏厲雄公

事落職罷官觀

勅具官某爾奉祠就養宜無與於公府知篤葭  
莩之好而忘瓜李之嫌事發相重遂徹朕聽收  
還延閣之直仍罷祠宮之官尚其省循予不汝  
棄可

侍御史林大中直寶文閣知寧國府

勅具官某朕惟天子耳目之官與夫言語侍從  
之臣皆極天下選豈應輕去然進退之際君子  
之大致存焉朕亦欲有以全之爾以清德雅望  
周旋三院有年矣憂國之忠匪躬之節論事有  
體義形於色臺綱斯振物論浩然擢貳銓衡所  
冀獻納之益而抗章自列引義不回宣城大邦



實 慈皇初潛之地寓直寶奎以寵爾行牧御  
之方無俟多訓勿以在外而忘告猶政成來歸  
副我虛佇可

知漳州鄧駟江東提刑

勅具官某入而居獻替之選出而任澄按之寄  
皆朕耳目之官也以爾端靖有守雅望甚休擢  
在諫垣出鎮南服江左祥刑之重肆以命汝豈  
惟引以寢近爲爾之寵抑使列城之人知朝廷  
垂意臬事至遣諫官以臨之書不云乎好生之  
德洽于民心朕將庶幾焉可

知廬州許及之大理少卿

勅具官某朕承 累聖仁厚之餘雖罔敢兼于  
庶獄而明罰勅法求惟厥中乃者播告之修孚  
于中外矣爾以諫省之舊知予德意而明敏詳  
練無施不且召自邊閩用爲廷尉之貳昔張釋  
之使天下無冤民于定國爲之民自以爲不冤  
汝往哉其爲朕持天下之平且以行汝學道愛  
人之志可

大理評事李珣再任

勅具官某廷尉之屬非明於文法不以輕授非



遲以歲月不能通貫也爾以名家子庀職旣久以其自列爰俾因任尚圖來效勿替厥初可

故太傅蒲察乂安女碩人乞用父遺表恩澤封郡夫人

勅命婦之封盍從於夫爵小君之號茲出於君恩某官女碩人蒲察氏生長北方來歸王國謂父兄即世惟一身之僅存而恩渥自天曾累歲而未請乃叩九闈之邃願加列郡之稱亮其忱衷矧有近比特疏予寵用慰爾心可

忠訓郎興州遊奕軍權統領常崇轉

一官

勅具官某朕周知中外將士之才間使來前用閱其實不以遠近爲間也爾來自西陲人物可採何愛一秩以寵爾歸益習戎韜以俟有用可殿前司神勇軍統制訓武郎劉肇步軍司左軍統制修武郎姚旦總轄牧放倒斃數少各轉一官

勅具官某等歲分遣諸軍牧于浙右寬閑之鄉惟統御有方芻秣以時歸而閱實生全者衆進之一秩以爲來者之勸可



高夔知廬州

勅具官某爾頃守合肥嘗移之內郡近守四明又易以邊方乃自制司復分帥閩蓋以爾習熟淮甸有志事功故因以遷焉內有以固吾圍外有以宣王靈爾尚勉之哉可

朝奉大夫新知昌州程仲虎爲虧發

官錢降一官與閑慢差遣

勅具官某朕崇儉示朴未嘗加賦於郡邑然軍餉則不容闕也廣安雖小賦入有度及爾爲之闕供甚矣姑鑄一秩以爲罷軟之戒可

皇弟右監門衛大將軍某州刺史多

能多助收使父居中遺表各轉遥

郡團練使

勅具官某等朕親睦九族務從優恩而十階之進則謹守舊制未嘗私也以爾父嘗建節旄不  
及中壽遺奏之澤未請於朝俾爾昆弟俱領遥  
團之任朕之於爾厚矣尚惟恪恭以綏寵祿可

林鏢閣門舍人

勅具官某爾以武科首選庀職上閤有年矣銜  
恤告歸免喪入見俾還舊班益務恭恪可



中大夫知寧國府蔣繼周磨勘轉官  
勅擁千里之麾方著民庸之茂考三載之績尚  
伸吏課之公具官某被眷 慈皇進班言路以  
中執法之舊爲東諸侯之尊政最有聞尚有稽  
於褒表封章來上何屢請於歸休茲以年勞應  
于銓法爰峻文階之秩遂登從橐之聯大異庶  
工徃抵茂渥可

知廣州岳霖敷文閣待制致仕

勅帥閫有嚴方任顧憂之寄囊封何遽來騰告  
老之章驚爾疚之寢深撫予衷而甚戚具官某  
秉心端亮遇事詳明少歷艱勤養成畏謹之性  
晚更事任率有循良之稱念方虎之舊勲擢嚴  
吾之近侍一辭軒陛游閱歲時起分嶺表之麾  
俄感漳濱之疾宦游南海曾無煖席之淹次對  
西清用示掛冠之寵尚期自厚以冀有瘳可

岳霖贈四官

勅掛冠有請方聯次對之班易筭可哀宜厚飾  
終之典云胡弗淑而至於斯具官某出自勲門  
動遵士檢攬轡登車之寄夙著賢勞簪筆持橐  
之除實由親擢分五羊而作牧擁駟馬以啓行



何恙之深此生遂已念世臣之無幾愴長夜之不晨忍聞垂絕之言寧愛不貲之寵躡四階而進秩按三尺以疏恩用大爾家庶將予意可

知贛州趙彥操知廣州

勅具官某爾頃爲列卿攝民曹領京邑以才譖稱今二十年矣屢試劇郡政最卓然南海巨屏實控百粵去朝廷遠委任尤重章貢壤地相接不惟通知風俗之宜南方亦以聞爾之名矣舉以命爾其爲朕綏編疇撫蠻蠻使嶺海之間不異畿甸庶有以副朕不忘遠之意可

知靜江府趙思集英殿修撰提舉江

州太平興國宮

勅具官某朕擇才而用謀帥尤艱廣右去朝廷遠二十五州綿地甚廣爾以甘泉舊臣起家作牧而兩載之間內外晏然治行可睹矣方圖爾功而以疾諗丐閑甚力何耶均逸祠庭遂爾賦歸之志陞華論譔示予篤舊之恩尚勉壯猶毋忘忠報可

攻媿先生文集卷第三十









